



*Ti has fideivlamein luvrau.
Per nus tuti giu grond quitau.
Lu has la veta bein finiu.
Sco il sulegl va da rendiu.
O cara onda nus buc emblida.
Nus en veta e mort bein gida.*

En regurdientscha da

Johanna Benedicta Venzin (Onda Anna)

28.10.1919 - 17.11.2013

L'onda Anna ei naschida ils 28 octobre 1919 ella biala ucliva a Selva. Sia veta ei stada lavur, oraziun e carezia per nus. Sco buobetta da sis onns, ha ella cun sias soras e sia mumma, stuiu prender cumiau da siu car bab. Il bab ei morts dad ina maligna malsogna. Per la mumma e las feglas ei quei stau in fetg grev temps.

Ils emprems onns da scola ha l'onda Anna frequentau a Selva e suenter vinavon a Rueras. Sco buobetta da mo sis onns, ha ella adina stuiu segidar cun sia mumma, sco quei ch'ella sezza ha adina menziunau a nus. Per nus, il Nikolaus, la Sabina ed il Silvio ei nossa onda Anna stada sco ina mumma.

L'onda Anna ha adina giu ureglas e mauns aviarts per nus, tut ils problems havein nus astgau purtar ad ella, ses cussegls han adina gidau nus sco affons ed era pli tard cu nus essan stai pli vegls. Nus astgein dir, l'onda Anna ei stada ina fetg buna cun nus. Ella ei stada la cuschiniera, pura dils tiers manedels (cauras) ed era la signuna. Latg e caschiel tgaura ch'ella haveva caschau, havein nus adina puspei saviu gustar.

La gronda passiun da nossa onda ei stau il teisser. Tgi ha buca da gliez temps schau teisser in ni l'auter teppi. Per nuot vegnevan ellas buca numnadas las tissunzas da Rueras.

Era nus sco affons, havein adina stuiu prender part e tagliar si lumpas e far si speuls. Quei havein nus fatg bugen, ei ha adina dau enzatgei bien persuenter.

L'onda Anna ei adina segidada cul nevs Silvio el puesser. Quei ei stau en casa ni sil funs, nua ch'ei ha fatg da basegns.

Il temps varga e tuttenina ein las duas ondas Johanna e Martina vegnidas persulas. Suenter in disturbi da sanadad ha l'onda Anna stuiu prender entgins dis dimora el spital a Glion.

Sia sanadad ha lu buca schau tier da turnar puspei a casa paterna a Rueras ed ils 08 da november 2002 ha ella anflau in niev da casa a Mustér. Ella ei vegnida prida si fetg bein en la casa da tgira Sursassiala, ed ei sessentida bein cun la nova situaziun. Visetas ha ella adina giu bugen, ella selegrava cura che la sora Martina vegneva speraso. Mo era da nossas visetas ha ella adina giu grond plascher.

L'onda Anna ei stada ina fetg buna pazienta, ha purtau sia crusch cun gronda pazienza. Sia veta ei stada lavur ed oraziun.

La dumengia, ils 17 november 2013 ei nossa onda Anna vegnida clama da dil patrun sur veta e mort ella biala vegliadetgna da 94 onns.

Ella ei vegnida tgirada a Mustér ed a Curaglia cun bia carezia. Tut il personal han fatg cun nossa onda fetg bien e giu grond quitau dad ella, quei astgein nus dir.

Perquei lein nus aunc inagada engraziar grondamein alla casa da tgira Sursassiala sco era al personal per tut il bien che Vus haveis fatg cun nossa onda Anna.

Era a tuts quels che han gidau ni visitau nossa onda duront sia veta lein nus dir in grond Dieus paghi.

Cara onda, ruaussa en pasch.

Tia niazza Sabina cun famiglias